



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Stephani Balvzii Miscellaneorum Liber ... Hoc est,
Collectio Veterum monumentorum, quæ hactenus
latuerant in varijs codicibus ac bibliothecis**

Baluze, Etienne

Parisiis, 1679

Litteræ Capituli Remensis ad Abbatem Clarevallensem, qui est in
Episcopum electus.

urn:nbn:de:hbz:466:1-14735

& conditor universitatis, in cuius ditione cuncta sunt posita, pro nobis egere dignatus est & mendicare, in qua venit non ministrari sed ministrare & animam suam redemptionem dare pro multis, in qua causa nostræ reparationis tot indigna pertulit, opprobrium hominum & abjectio plebis factus, & ad ultimum morte turpissima condemnatus. Christo igitur pro nobis in carne passo, pro nobis in cruce clavis confixo, Doctor amandissime, compatiamur: quoniam si compatimur, & conregnabimus. Valet, & nolite omni spiritui credere; sed probate spiritus si ex Deo sunt. Quid autem super his animi geratis, vestrarum occursum litterarum desideramus & instanter petimus edoceri,

Chronicon Alberici ad annum 1194. Magister Michael Decanus Parisiensis, vir theologus & religiosus, in Patriarcham Hierosolymorum est electus; sed antequam illuc iter arriperet, factus est Senonensis Archiepiscopus.

LITTERÆ CAPITVLI

Remensis ad Abbatem Claravallensem, qui est in Episcopum electus.

Bonorum omnium largitor, qui fidelium actus in An. 1204: suæ beneplacito voluntatis disponit, actiones & voluntates nostras ita reddidit uniformes quòd post felici memorie Vvillelmi Archiepiscopi Remensis vos in patrem elegimus & pastorem. Vnde gaudet Ecclesia, serenissimus Rex Francorum plurimum conlætatur, & plebs universa congaudet, quòd Claravallensis Abbas obtinet sedem Remensem, qui virtutum claritudine metropolitanam faciet Eccle-

Q iij

fiam refulgere. Vestram igitur sanctitatem confidentiùs exoramus quatenus electionem recipere dignemini, nobis terminum aliquem præfigentes in quo pro nobis venire honorabiliter debeamus.

Responsiva electi electioni renuntiantis.

Licet fueritis in eligendo concordēs, in electionis tamen serie oberrastis, cum illum duxistis ad secularia revocare qui jam postposito Marthæ ministerio, appetit cœlestia contemplari. Ne igitur in vanum ulterius laboretis, vobis tenore præsentium innotescat quod electioni penitus renuntio, nec unquam alicujus honorem suscipiam præfulatus.

Litteræ iterum Capituli ad eundem.

Ecclesia Remensis fracto archiepiscopali remone sine remige naufragatur. Et iccirco vos elegimus in Archipræsulem & pastorem, quoniam in alio nequimus esse concordēs. Vnde miramur quod electioni tam concorditer factæ renuntiare duxistis, non attendentes quod beatissimi Nicolaus & Martinus conservando regulæ monasticæ disciplinam in pontificalibus cathedris resederunt, in quibus multa caritatis opera exercentes, signis & miraculis coruscant, & hodie ipsorum merita noscuntur in domo Domini relucere. Paternitati vestræ igitur confidentiùs supplicamus ut votis nostris clementer annuere dignemini & electioni factæ dilatione postposita consentire. Alioquin per summum Pontificem cogemini subire archiepiscopale onus quod ab subciles & humiles persuasiones fidelium suscipere denegatis.

Responsiva electi contradicentis.

Cum nuper inter Claravallensis ordinis fratres in pace solita permanerem, fratrum regimini ex al-

sumpto administrationis immo servitutis officio superintendens, insufficientiæ meæ vestris litteris intimastis quòd me in Archiepiscopum elegeratis; cuius electioni renuntiavi penitus, prout meis litteris potuistis evidentiùs intueri. Sed postmodum ex parte universitatis vestræ fuerunt mihi litteræ apportatæ in quibus continebatur quòd me per summum Pontificem cogeretis. In quo plurimùm fui secundùm vestrum hominem conturbatus; quia non decet ordinem monachalem in archiepiscopali cathedra residere, & maximè cùm juxta nominis interpretationem monachus unus tristis dicatur, & monasterium statio unius. Non esset igitur mutatio dexteræ excelsi, sed fieret ordo retrogradus & ingressibilis ad mundana. Ceterùm qui monachus in urbe, vel qui debet agere solitarius inter plebeias catervas, diceretur quidem à multis: Non dimisit seculum ut transitoria fugeret & caduca, & iterum velut canis immundissimus revertitur ad vomitum, & qui consueverat legumina sumere cum actionibus gratiarum, nunc mella fastidit & cibaria delicata, super palafredum rotans undique phaleratum, inebriando se vino, in quo est luxuria, loco aquæ simplicis quam sumi prædicat regula monachalis. Nec tenet similitudo quam de beatissimis Nicolao & Martino proponitis: quia tunc non habebant castella & arces Ecclesiæ cathedrales, nec incedebant Pontifices loricati. Sed nunc propter superabundantiam temporalium rerum flamma, ferro, cæde possessiones Ecclesiarum Prælati defendunt, quas deberent pauperibus erogare. Quapropter electioni renuntiavi & iteratò renuntio, cupiens sedere ad pedes Domini cum Maria, quicquid Dominus Papa referat; qui licèt ligandi & solvendi habeat potestatem, non tamen debet nec valet sanctum spiritum prohibere.

Q iijj